

LA USC DI LADINS – VENERDI' 21 GIUGNO 2019

STORIA E CULTURA

Novitèdes per la seziun del Stònt

N video e vèlch intervent defora darà l met de l cognoscer amò miec l'ultima seziun del Museo Ladin de Fascia a Ciampedel



Su la facèda del Stònt vegnarà metù endò la letres I.R., che era su storicamenter.

Per portèr dant la più joena seziun del Museo Ladin de Fascia “L. Stònt” de Ciampedel te na vida amò miora, vègn endrezà desvaliva scomenzadives.

Defat, l'è stat enjignà n filmat che reiona avisa de la storia di scizeres e del stònt de Ciampedel, e l vègn manà fora tant te la rubrica “L. Cianton de l'Istitut” su TML (canal 642) che tel web su la Mediateca Ladina.

Amò apede, de gra a la colaborazion anter l'Istitut Cultural Ladin, l Comun de Ciampedel e la Compagnia di Shizeres de Fasha, vegnarà amò comedà la pèrt defora de la seziun.

Do aer ciapà la permiscion da man de la Soprintendenza per i Bens Culturèi, apede a la scritta “Casino di Bersaglio Comunale Campitello” vegnarà jontà la letres “I.R.”, che volessa dir Imperial Regio. Chesta letres vegnia durèdes te duc i frabicac



L. mur de protezion del tiro lonch, cori da èlbres e cescogn.

de la medema sort te Fascia e tel Trentin. Les è documentèdes storicamenter e amò ancheondi se rua tanche a lejer de gra ai segnes depenc che ciuta dal mur.

Ti meis che vègn se rencurarà sù l'area olache l'era l'ulac per l tiro lonch, che l pojèa su n mur de protezion, ades deldut cori da èlbres e cescogn. L tiro curt, enzeve, l se troa n mingol più en su, chest documentà da veia fotografies. L Museo vel meter te la doi localitèdes doi scartabie che i conte la particolaritèdes de chisc doi lesc.

Amò n auter projet l'è chel de meter fora na tabela più grana defora dal stònt, olache la jent pel lejer la informazions ence canche la seziun la è serèda.

L stònt restarà avert a la jent fora per l'istà dai 24 de jugn ai 7 de setember, dal lunces a la sabeda da les 17.00 a les 19.00 e a l vardèr via e ge dèr informazions ai vijitadores sarà Annelise Vian.

Dai 2 de messèl ai 3 de setember, vigni mèrtesc da les 17.30 se podarà ence tor pèrt a na vijita vidèda organisèda da la guides del Museo (info e prenotazion te Museo Ladin, tel. 0462 760182).

No perdè l'ocajion de descorig zeche da nef su noscia storia! NR